

## Imansipayshan Day

2021 gwahn dong eena hischri da Bileez. Wai? Fi lat a ting, bot fi mee, wan a di tap-a-tap reezn da sayka how 2021 da wen govament mek Aagas Fos wahn holiday. Ahn fi wai? Fi maak **Imansipayshan Day** az wahn nashanal holiday! YAAAAAAAAAAAAAAAAAAAAAAAAAAAAAAAAAAAAA! Lang taihn dis shuda mi du, bot... mataz bee, ih di hapm now!

Pleez mek wi bi op Miz Carolyn **Yaya Marin Coleman** fi push ahn push fi baan disya day nayhn az **Imansipayshan Day** (eena English, dis da “Emancipation Day”). Sayhn way, wi big op di **UBAD Educational Foundation**. Widowtn dehn, disya day maita mi neva maak eena Bileez az **Imansipayshan Day**. Nof rispek. Ahn nof rispek tu **di layt Kween a Kriol kolcha ahn myoozik, di layt Leela Vernon**. Leela da-mi sohnbadi weh mi-di push ahn push eena Kriol Kongsl fi too ting: wahn Kriol Day (maybi Septemba 9 fi bring een di 10<sup>t</sup> —noh hafu bi wahn holiday) ahn wahn way fi maak Aagas Fos fi maak wi hischri weh help mek wi hoo wi tudeh. Leela mi-di fait fi dis sins King Hama woz a Hachit.

**Pahn Imansipayshan Day,  
wi gi speshal membrans tu wen wi ansestaz mi free fahn  
enslayvment: Aagas 1, 1838  
(Salabrayt dis yaa pahn Mondeh, Aagas 2, 2021.)  
Mek wi taak now seeryos seeryos wan bowt iekonomik  
imansipayshan fahn ya goh bak.**